


TEZAU LITURGIC
19 SEPTEMBRIE

SLUJBA
SF. PREOT-MUCENIC
CONSTANTIN
GOLUBEV
DE LA BOGOROD



MINEIUL PE SEPTEMBRIE
MOSCOVA



Месяца сентября в 19-й день Священномученика Константина, пресвитера Богородскаго

На велицей вечерни

На Господи, воззвах: стихиры на 8, глас 5.

Подобен: Радуйся, Живоносный Кресте:

Отче священномучениче Константине,/ от юности усердно Истину взыскуя,/ мудрость духовную добре стяжал еси./ Темже и Бог людем заблуждшим тя яви,/ пастыря добраго, благочестия поборника,/ веры Православныя защитника и расколов обличителя,/ правды Божия неустрашимаго проповедника./ Укрепи и нас, святе, во истине право ходити,/ еже спастися душам нашим.

Священства дар прием/ и крест твой на рамо взем,/ добрый пастырю Константине,/ добле во благочестии потрудился еси/ и, мужественне даже до смерти пострадав,/ от Христа мученический венец приял еси./ Ныне, в Небеснем Царствии Пасхи вечныя наслаждаяся,/ со всеми святыми Бога

прославляеши,/ Егоже моли даровати нам велию милость.

Отче священномучениче Константине,/ Церкви Русския благое украшение,/ вельми тя Христос прослави/ и слово истины тебе дарова,/ имже, плевелы раскола исторгая,/ многия люди во ограду церковную возвратил еси/ и единение духа в союзе мира хранити призывал еси./ Темже в единомыслии и нас утверди,/ во еже спастися душам нашим.

Отче священномучениче Константине,/ светом Христовы истины сияя,/ землю Московскую просветил еси/ и, тьму зловерия отгоняя,/ заблуждшыя к Богу обратил еси,/ семена же благочестия насаждая,/ души верных, яко плод духовный, Христу принесл еси./ Ныне же, в Небесных селениих пребывая,/ моли спастися душам нашим.

Слава, глас 8:

Приидите, вернии, лик составльше,/ благодарственную песнь принесем Триипостасному Богу,/ даровавшему нам добропобедного мученика Константина,/ истинного проповедника

Божественнаго Евангелія,/ добраго пастыря
словесных овец,/ теплаго молитвенника и усерднаго
ходатая,/ и с любовью вси возопиим:/ Господи,
молитвами и предстательством угодника Твоего/
помилуй и спаси души наша.

И ныне, праздника.

Вход. Прокимен дне. И чтения 3 мученическая.

На литии стихира, глас 6:

Яко дар священный,/ страдания восприял еси
Христа ради,/ Иже тя, яко вернаго раба Своего,/
священномучениче Константине,/ победным венцем
украши/ и лику святых мучеников сочета./ Емуже
молися, теплый наш предстателю,/ отечеству нашему
в мире пребывати/ и людем ея во истинней вере
ходити.

Слава, глас 8:

Како беззаконнии людие на праведнаго руки своя
простроша?/ Како кроткаго гласа не услышаша?/
Како иереа Божия убити не устрашишася/ и, люте
злбствующе, в земли живаго погребоша?/ О,
безбожных тщетнаго ликования!/ Ихже безумную

злобу Христос упраздни./ Темже Церковь Небесная
светло торжествует/ и победоносного Константина с
радостью сретает,/ егоже Христос Бог, светлым
венцем венчая,/ в ризы беляя облакает/ и
мученическому лику совокупляет./ Мы же со
умилением зовем:/ Господи, молитвами Твоего
угодника/ в вере истинней укрепи и помилуй нас.

И ныне, праздника.

На стиховне стихиры, глас 2.

Подобен: Егда от Древа:

Егда законопреступнии людие,/ злобою неверия
ослепленнии,/ в темницу мрачную тя всадиша/ и
неправедно на смерть осудиша,/ тогда, блаженне
Константине,/ любовью ко Христу распалаемь,/ сие
глагола еси:/ Боже, в помощь мою вонми,/ Господи,
помощи ми потщися.

Стих: Священницы Твои облечутся в правду/ и
преподобнии Твои возрадуются.

Егда безбожнии мучителие,/ беззаконное веление
исполняюще,/ руки своя на тя возложиша/ и, яко
злодея, на смерть ведоша,/ тогда, святе

исповедниче,/ верою в Сына Божия укрепляемь/ и
умныма очима на подвиг Его взирая,/ страданий
лютых не убоялся еси/ и, яко жертва священная, Богу
принеслся еси.

Стих: Блажен муж, бояйся Господа,/ в
заповедех Его восхощет зело.

Егда нечестивии убийцы,/ жестокою раною тя
уязвивше,/ в ров жива суца ввергаху/ и
немилостивно землею погребяху,/ тогда,
страстотерпче славный,/ страдания лютая
претерпевая,/ образ мужества показал еси/ и, телом в
земли посеявся,/ душою в Царствии Небеснем
процвел еси.

Слава, глас 8:

О, людие, веру отеческую презревшии!/ Камо
ведете мя, яко разбойника?/ Почто руки своя на мя
простираете/ и раною жестокою уязвляете?/ Почто
мя, жива суца, в рове полагаете/ и землею
немилостивно покрываете?/ Не ведаете убо, что
творите,/ сие священномученик Константин кротко
глаголаше,/ душу свою Господеви предавая.

И ныне, праздника.

Тропарь, глас 4:

Священником украшение и мучеником похвала/
явился еси, отче Константине,/ ты бо, многия люди во
ограду Церкви возвратил еси/ и небаязненно
страдания и смерть за Христа приял еси./ Ныне же
моли Человеколюбца Бога/ Церковь Русскую от ересей
и расколов сохранить/ и спастися душам нашим.

На утрени

По 1-м стихословии седален, глас 3:

Веселися днесь, земле Московская, имеющи
тепльа молитвенники, новыа страдальцы за веру
Христову, подвиги своими пределы твоя освятившиа.
В нихже и священномученик Константин, града
Богородска благое украшение, богомудрыми словесы
плевелы раскола искоренив, образ благочестия и
православнаго исповедания в сердцах верных насади.
Темже, память его совершающе, Бога, дивнаго во
святых Своих, достожджно прославим.

Слава, и ныне, праздника.

По 2-м стихословии седален, глас 4:

Наставления твоя, Константине богомудре, всех послушающих тебе духовне напиташа, ты бо, горняя, а не земная всегда мудрствовати поучая, ралом словес твоих окаменевшая сердца людей возделал еси и, евангельское семя в них насадив, многоплодны сотворил еси. Помози и нам, святче Божий, тесным и узким путем Царства Небеснаго достигнути.

Слава, и ныне, праздника.

Величание:

Величаем тя, / священномучениче Константине, / и чтим честная страдания твоя, / яже за Христа / претерпел еси.

Псалом избранный: Бог нам Прибежище и Сила.

Господи, воздвигни силу Твою и прииди, во еже спасти ны.

Глаголах о свидениях Твоих пред цари и не стыдяхся.

Вси языцы обыдоша мя и именем Господним противляхся им.

Тебе ради умерщвляемся весь день, вменихомся,
яко овцы заколения.

Крепость моя и пение мое Господь и бысть мне во
спасение.

По полиелеи седален, глас 8:

Светом Христовым просвещаемь, расколы и ереси
искоренял еси, святе Константине. Мы же,
пастырския твоя труды почитающе и мужеству в
страданиих дивящися, усердно просим: помози нам
Православную веру свято хранить и, взявше крест
свой, во след Христа шествовати.

Слава, и ныне, праздника.

Степенна, 1-й антифон 4-го гласа. Прокимен, глас
4: Пройдохом сквозе огонь и воду/ и извел еси ны в
покой. Стих: Разжегъ ны еси, якоже разжизается
сребро. Всякое дыхание: Евангелие от Матфея, зачало

По 50-м псалме стихира, глас 6:

Града Богородска украшение,/ Церкви Русския
светлую похвалу,/ Православия твердаго поборника,/
благочестия истиннаго ревнителя,/ расколов и ересей

искоренителя,/ днесъ восхвалим, вернии,/ Константина, священномученика добропобеднаго/ и теплаго о нас пред Богом молитвенника.

Канон священномученика, глас 4, егоже краегранесие: Похваляю победоноснаго Константина.

Песнь 1

Ирмос: *Моря чермную пучину/ невлажными стопами/ древний пешешествовав, Израиль/ крестообразныма Моисеовыма рукама/ Амаликову силу в пустыни победил есть.*

Просвети сердце мое, Владыко Господи, и подаждь свыше светозарную благодать, воспети похвальная пения Твоему угоднику, злобу безбожных гонителей победившему.

От юности Христа всем сердцем возлюбив, Константине блаженне, во дни гонений пастырь добрый и мученик непобедимый явился еси.

Храм души твоя в чистоте соблюл еси и многия добродетели стяжал еси, священномучениче Константине, темже и Господь дарова ти силу

пребыти непоколебиму и Царствия Небеснаго достигнути.

Богородичен: Волнами страстей душу мою боримую чистотою помыслов умири, Пресвятая Дево, Ты бо еси Заступница усердная рода христианскаго.

Песнь 3

Ирмос: *Веселится о Тебе Церковь Твоя, Христе, зовущи:/ Ты моя крепость, Господи,/ и прибежище, и утверждение.*

Апостольским стопам последуя и благодатию Духа Святаго просвещаемъ, отче Константине, множество суемудренных во ограду святыя Церкви привел еси и овцы стада Христова соделал еси.

Лик светлый составльше, воспоим память святаго Константина, той бо, славою небесною облистаемъ, вкупе с новомученики Церкви Русския молится о спасении душ наших.

Яко крин сельный и цвет благоуханный, процвел еси подвиги твоими, блаженне Константине, и кровей твоих излиянными плоды многия Богови принесл еси.

Богородичен: Юже ангели светоносно воспевают и земнороднии достойно ублажают, Божию Матерь вси почтим и чистое житие Той принесем.

Седален, глас 3:

Возсиял еси, яко звезда лучезарная, достохвальне, тьму неверия разгоняя и ересей лукавое мудрование посрамляя, мучимыя страстию пианства на путь спасительный возвращая и заблудшия люди к покаянию призывая. Темже, прославляюще добродетели и подвиги твоя, умильно вопием: досточудне отче Константине, укрепи нас во истинней вере и на путь благочестия настави молитвами твоими.

Слава, и ныне, праздника.

Песнь 4

Ирмос: *Вознесена Тя видевши Церковь на Кресте,/ Солнце Праведное,/ ста в чине своем,/ достойно зывающи:/ слава силе Твоей, Господи.*

Пение похвальное благоговейно приносим ти, святе Константине, Бога же, давшаго ти крепость во

страдании, прославляем, взывающе: слава силе Твоей, Господи.

Очистив ум твой и божественными помыслы озарився, святе, яко пастырь добрый, душу твою за овцы полагал еси, молитвенно Богу взывая: слава силе Твоей, Господи.

Богородскую паству водами жизни вечныя напоил еси, богоносче Константине, и, яко делатель добрый, в вертограде Христове усердно потрудился еси, присно воспевая: слава силе Твоей, Господи.

Богородичен: Евангельских учений росую божественною окропи изсохшая сердца наша, Пречистая Дево, да воспоем Тя, яко Источника Жизни нам рождшую.

Песнь 5

Ирмос: Ты, Господи, мой Свет,/ в мир пришел еси,/ Свет Святый, обращаай из мрачна неведения/ верою воспевающия Тя.

Духа Пресвятаго обитель чудная быв, преблаженне Константине, люди, зломудрием омраченныя и

гордостию ослепленные, к свету истинного боговедения привел еси.

Озари и наша души, помраченные грехом, и к свету богоразумия настави, пастырю добрый, да путем заповедей Господних непорочно ходити будем.

На камени веры утверждаяся, досточудне Константине, столп непоколебимъ в годину гонений явился еси, зловерие нечестивых мужески посекаяя.

Богородичен: Одигитрие Благая, на путь спасения направи нас молитвами Твоими и от скорбей, находящихся на ны, избави.

Песнь 6

Ирмос: *Пожру Ти со гласом хваления, Господи,/ Церковь вопиет Ти,/ от бесовския крове очищися/ ради милости от ребр Твоих/ истекшею Кровию.*

Светлый праздник памяти твоея, блаженне Константине, верныя люди воедино собра, еже прославити твоя доблественныя подвиги и за Христа страдания, имиже мрак безбожия разгоняется.

Неистовою злобою гонителей, еще жив сый, немилостивно в земли погребен был еси,

страстотерпче, обаче, яко клас зрелый, в рай сладости богато процвел еси.

Апостолом, мучеником и пророком в ревности о славе Божией подобяся, отверзл еси уста во обличение беззаконных, священне Константине, и, муки за Христа прием, лику святых сочетался еси.

Богородичен: Гору Тя, благодатию Божиею приосененную, пророк прозорливо разуме, Пречистая Дево, от Тебе бо отсецется Камень Жизни, Христос Бог наш во спасение наше и обновление.

Кондак, глас 5:

Ревностию о вере Христове от юности возгоревся, / богомудре отче Константине, / заповедем евангельским последовал еси / и светильник веры заблуждшим явился еси. / Темже, страданием за Христа жизнь твою увенчав, / Бога в подвиге прославил еси, / Егоже моли спастися душам нашим.

Икос:

Гласу Божественнаго Учителя повинуюся, яко премудр ловец явился еси, святе Константине, и, мрежею словес души заблуждшыя из глубины

греховныя извлячая, на путь спасения наставил еси.

Сего ради похвальная восписуем ти сице:

Радуйся, истиннаго пастырства светлое сияние;
радуйся, честнаго мученичества добрая похвало.
Радуйся, мед словес евангельских вкусивый;
радуйся, сими глад духовный утоливый.

Радуйся, заповедей Божиих ревностный
исполнителю;

радуйся, неверия и раскола мудрый обличителю.

Радуйся, Константине досточудный, теплый о нас
пред Богом молитвенниче.

Песнь 7

Ирмос: В пеци авраамстии отроцы персидстей,/
любовию благочестия паче,/ нежели пламенем,
опаляеми, зываху:/ благословен еси в храме славы
Твоея, Господи.

Огнем Божественныя любве, мучениче Христов
Константине, лед неверия растопил еси и чистотою
исповедания твоего возгрел еси верных сердца
воспевати Богу: благословен еси в храме славы Твоея,
Господи.

Кротце страдания терпя, святе Константине, незлобием единого от мучителей ко Христу обратил еси, еще же и самовидца кончины твоея мученичеству сочел еси. Ныне же купно с ними взываеши: благословен еси в храме славы Твоея, Господи.

О, неизглаголаннаго долготерпения! Константин блаженный люте умерщвляется и землею покрывается. Обаче ангели душу его святую к Престолу Божию возносят, идеже небожители вопиют: благословен еси в храме славы Твоея, Господи.

Богородичен: Надежда и Покров еси на Тя уповающим, Богородице Дево. Молитвами Твоими на враги видимыя и невидимыя укрепи ны и Сыну Твоему пети достойно сподоби: благословен еси в храме славы Твоея, Господи.

Песнь 8

Ирмос: Руце распростер, Даниил/ львов зияния в рове затче;/
огненную же силу угасиша,/ добродетелию препоясавшися,/ благочестия

рачители, отроцы, взывающе:/ благословите, вся дела Господня, Господа.

Страж веры Православных непоколебимъ явился еси, священномучениче, первое убо многая лжемудрования избличая, второе же верность Христу пред мучители показуя, темже Владыце взываеши: благословите, вся дела Господня, Господа.

Темничное заключение и истязания незаконных мучителей не возмогоша поколебати твердость веры твоя, святе Константине, ты бо, мужески вся претерпев, райския обители достиг еси, идеже ныне светло воспеваеши: благословите, вся дела Господня, Господа.

Аще и убиен был еси, мучениче славне, обаче ныне во обителях Царя Небеснаго жизни вечныя наслаждаеши и с лики святых новомучеников и исповедников победне взываеши: благословите, вся дела Господня, Господа.

Богородичен: Наследия Небеснаго не даждь нам лишиться, Пресвятая Дево, но молитвами Твоими

сподоби нас со святым Константином воспевати:
благословите, вся дела Господня, Господа.

Песнь 9

Ирмос: *Камень нерукосечный/ от несекомья
горы, Тебе, Дево,/ краеугольный отсечеса,/ Христос,
совокупивый разстоящая естества./ Тем,
веселящися, Тя, Богородице, величаем.*

Тело твое, святе Константине, Бог нетлением
прослави и, яко многоценное сокровище нам явив,
благоволи положити во утверждение олтарей храмов
земли Московския. Мы же, Источника бессмертия
вкушающе, причастники жизни вечныя бываем.

Исповедника тверда, мученика славна и пастыря
добра именуем тя, Константине блаженне, и, подвиги
твоими назидаемы, усердно просим: не лиши нас и
ныне твоего отеческаго попечения.

Не может язык человеческий воспети по
достоянию подвиги ваша, мученицы Христовы, мы
же, любовью движими, приносим похвалы сия и
молим: присно ходатайствуйте о спасении душ
наших.

Богородичен: Агница нескверная, Агнца Божия
верным рождши, Пречистая Дево, спаси любовью
поющыя Тя и заступления Твоего усердно просящыя.

Светилен:

Днесь, вернии, вкупе собравшеся, светлость
настоящаго праздника возвестим и
священномученика Константина песньми прославим,
егоже Христос сына Света показа и даров Духа
Святаго исполни.

Слава, и ныне, праздника.

На хвалитех стихиры, глас 8.

Подобен: О, преславнаго чудесе:

О, преславнаго чудесе!/ Константин, пресвитер
Богородский,/ лютыми страданьми и мучением/
проповедник всеобщаго Воскресения является/ и в
земли, еще жив сый, погребается,/ обаче нетлением
телесе от Бога прославляется,/ и в Небеснем
Царствии со всеми святыми/ истее Пасхи Христовы
причащается/ и молится о душах наших.

О, преславнаго чудесе!/ Путь тесный в широту
райскую приводит/ и мучение Христа ради/

несказанного блаженства сподобляет./ На тебе же, добропобедне Константине,/ сия преславно исполнишася./ Помози и нам, страстотерпче,/ верность Богу даже до смерти сохранить/ и Царствия Небеснаго достигнути.

О, преславнаго чудесе!/ Константин, добропобедный мученик,/ священную одежду обогрив своею кровию,/ страданьми Небесных селений достигл есть,/ идеже ныне престолу Агнца Божия предстоит/ и со Ангелы победно взывает:/ благословение, и слава, и премудрость,/ и хвала, и честь, и сила, и крепость Богу нашему/ во веки веков.

Аминь.

Слава, глас 6:

Мужественне крест твой на рамо взем/ и добродетельми вооружився,/ безбожнныя наветы гонителей силою Божиею победил еси/ и мученическими страданьми божественнаго пристанища достигл еси,/ идеже от Владыки Христа услышал еси:/ благий рабе и верный,/ вниди в радость Господа твоего./ Того моли, Константине

блаженне,/ грехов оставление и исправление жития
нам подати,/ чтущим любовь святую память твою.

И ныне, праздника.

На Литургии

Блаженна от канона праздника песнь 3-я и
святаго песнь 6-я. Прокимен, глас 7: Честна пред
Господем/ смерть преподобных Его. Стих: Что воздам
Господеви о всех, яже воздаде ми? Апостол к
Римляном, зачало 99 (8, 28-39). Аллилуиа, глас 2:
Священницы Твои облечутся в правду/ и
преподобнии Твои возрадуются. Стих: Бог нам
Прибежище и Сила,/ Помощник в скорбех, обретших
ны зело. Евангелие от Луки, зачало 106, (21, 12-19).
Причастен праздника и святаго: В память вечную
будет праведник:

**Священный Синод на заседании 16-17 июля 2020
года (журнал № 34) утвердил к общецерковному
богослужебному употреблению текст службы
священномученику Константину Богородскому]**

